

Pablopa Epesodenidsa ima teppe dosse inajaro Efesios

Epesopi dsama Asiahuajicca odsa panani. Pablopa nahidsa huajano 3 naha madijari. Nahidsa madidsa Jesocristo tahimari maride tojadsapa madija huapi taha Jesodsa toquejenajari. Najaro imapi Roca dsodo inajaro Jesocca dodosse tabaqqui tahimarideni capítulo 19' dsa, 20' dsa naqui anijaro.

Dsotode Pablo dsama onihihuaji madidsapa Epesocca madijadsa ajijaro ima dsodo inajaro. Dio pohuadenidsa huati cahanari canahicca ima denima tocahatterahijine, Dio jipa tahiccara inanamanadsa madimanahijine naqui dsodo inajaro.

Jesocristodsa iquejenadsapi icca madie dsati tojajaro. Imadinissa tanijinecca ima naqui Pablo dsodo inajaro.

Tabaccorehe jinede Satanapa iadsa dissera tajari, imasiri inananiijine. Pablocca dsodonijipi ia mari tocanabaqquijaro, dacoco ijiraniijine, imasiridsa iedimajeraniijine.

Pablo nija najari

¹ ¿Nija ohuemecotedeni? Occa ima tiadenidsa dsodo onajaro. Ohuapi Pablo. Dio ohuadsa jipa tadsa Jesocristocca dodosse ojanijine otohui huahua najari. Jehe, nani odsa panani Epesodsa timadimanajaropi Diocca madija bicaqqui tiquinani, Jesocristodsa disseraqqui tiquinajarodenidsa dsodo onajaro. ² Icca Abi Dio, Pohua Bedi ia Medsede Jesocristo tedseje tiadenidsa ima bicani

inanamana-dsanapona. Poccadeni jonehe naqui tibodidenidsa tojadsanapona, onajaro.

Jesocristodsa iquejenajarojine ima bicani iadsa anijaro

³ Diodsa etti ajima inana: —Jehe Abi Dio, bica tinani, deni tijani. Iadsa ima bicani tinanajaro —ihidsanapona. Diopa pajissa ia Medsede Jesocristocca Abi. Jesocristodsa iquejenajarojine ima bicani memehuaji anijaro huapima iadsa da inajaro. Pohua Corimepa ibodidsa najaro ima bicani inanaridsajaro. ⁴ Diopa dsama inahatopo-geradsama itohui napojari. Pocca madija iquejenanijine ia tocattejidsabaquijari. Nama najaria Pohua Bedi Jesocristodsa pajissa inajarodeni ibodi ssiajaqquri nadsa Dio Pohuatohuira imadinissa dsanaponijine. Ia qqui tabaqquidsapa imasiri icappirani ia qqui tabaqquihitohui. Diopa iadsa huati huana tajari. ⁵ Diopa maittaccadsama: —Madija medse onanabaqquina, pina occa ejedenidenissa quinahijine —napojari nade. Nadsapi Pohua Bedi Jesocristodsa iquejenadsa Dio pocca madija iquejenajaro. Najaro imapi Diodsa bica tani. Pohua tohuini nadsa nema inanajaro. ⁶ Nadsama iapi: —¡Jehe Abi Dio, bica tinani, bica tinani! Iapi bicaqquri inejeraraha iadsa ima bicani tinanajaro. ¡Ticca tohuati huanehepi deni tojani! —ihinanajaro. Abi Diopa Pohua Bedi Jesocristodsa huati huana tajari. Najaridsa pajissa inadsapi iadsa ima bicani inanajaro. ⁷ Imasiri iadsa dacoraraha Dio itohui huati cahanari canadsa ia tappa tabaqquihijine pocca ejedeni eccorajari. Pohua emene toccajaropi icca imasiri manaconi tojajaro. Nadsapa Dio iadsa: —Ticcadeni imasiridsa epeje onani —najari. ⁸ Diopa nema inanajaropi iadsa pocca tohuati huanehe ahuato inanajaro. Memehuajicca nahatohue, tohuattehe huapima naqui iadsa inanaridsajaro. ⁹ Diopa iadsa ima bicani inananiijine ecahuapo-

jaropi tahide ahuatora taporaha jidapana iadsa ahuato inanajaro. Najaro imapi Pohua tohuini napodsa: — Occa ejedenidsa ajima onananitohui —napode.¹⁰ Najaroa nidsa dsotode Pohua tohuini nahicca huada bacco tadsa pocca tonahatobaquijnaja huapima aja memehuaajicca, namihuaajicca naco huapima inatassaquihitohui. Nadsapa Pohua Bedi Jesocristo huapimadsa deni inanadsapa pohuana huapima ecahuabaquihitohui.

¹¹ Diopa Pohua jipa tahicca inananiijine tohuini nadsa najarossa inanajaro. Tahide madija iquejena-jeraccadsama Diopa: —Madija ocattejidsa-baqquihitohui, occa madija toquejenadsa pohuadenidsa occa daniji bicani da onabaquijnijine —napohui nade. Nadsapi Jesocristodsa pajissa inadsa Diocca madija iquejenajaro. Nadsapi Dio pocca daniji bicani huati tapojaricca iadsa inanaridsanitohui.¹² Dio Pohua tohuini nadsa tahide ia jodiodenina Jesocristodsa pajissa inapojararo. Diodsa etidsedsa Pohuadsa: —Jehe Abi Dio, bica tinani, deni tijani —ihinananijine Dio ia tocattejidsabaquipojari.¹³ Tiadenipi jodio tiquejena-jeraraha Jesocristo tahimari icassiejeraniijinecca timittamanadsapi pajissa tiquinajaro. Nadsapi tiadeni naqui Jesocristocca tiquejenajaro. Nadsana Dio pocca madija tiquejenajaro ahuato tanijine Pohua Corime dosse inaronajari. Pina tahide huati tapojarissa najari: —Nidsa Ocorime tiadenidsa onanaridsanitohui —napohui nade.¹⁴ Dio Pohua Corime iadsa inanaridsajaripa pocca daniji bicani huati tapojaricca pajissa iadsa tojanitohui nahatoto inanijine. Najaro daniji bicanipi nidsa dsotode pocca madija idinibaquiqua jicahissa tadsapa pocca daniji bicani huapimadsa da inaridsanitohui. Dio nama najaria madija Pohuadsa huatidsemanadsa: —Jehe Abi Dio, bica tinani, deni tijani! —quiquinanahijine.

Pablopa Diocca nahatohuetohui Diodsa huati tajari

¹⁵ Ticcadeni ima omittaponidsama titohuideni Diodsa huati huati odsanapojaro. Aji ia Medsede Jesodsa pajissa tiquinanissa tajaro ima omittajaro. Diodsa toquejenajari huapimadsa naqui tetideni huanaqquri najaro quinahi omittadsa ohuatidsejaro. ¹⁶ Pajissa Diodsa huatide ojadsapi titohuideni ohuati ajima-jerajaro. Diodsa huati onadsapi: —Jehe Abi Dio, epejeni. Tijine bica tani. Epesodenicca jeheniji bica tadsa ohuatidseni —ohonanajaro. ¹⁷ Diopa ia Medsede Jesocristocca Abi bica tajari. Puhuadsa huati onadsa naqui: —Abi Dio, pohuadenidsa Ticorimecca tohuattehe, nahatohue tinanaridsaji —ohonanajaro. Pocca nahatohue tibodidenidsa inehemadsapi Diocca pajissehe tiadenidsa ahuato tanijine. Dio naco tiadenidsa tojidserara dsanapohuijine. ¹⁸ Diodsa ohuatti onih naqui: —Abi Dio, pohuadeni tedsejemacca ima bicani bodidenidsa ahuato tinanaji —ohonanajaro. Diopa pocca madija tiquejenanijine tiadeni huahua tabaqqujari. Itedsejemacca ima bicani iadsa tojanijine tohuini imadijaropi pajissa iadsa tojanitohui. Najaro nahatoqquri tiquinanijine Diodsa huati huati ohonanajaro. Dio Puhuadsa toquejenajaridenidsa pocca daniji bicani da inani nahatoqquri tiquinanijine naqui Puhuadsa huati huati ohonanajaro. ¹⁹ Dio pocca dacorehe naqui tiadenidsa ahuato tanijine Puhuadsa huati huati ohonanajaro. Pocca dacorehepi motarani, jicaqqijerani. Najaro dacorehepi Puhuadsa pajissa inajardenidsa anijaro. Najaro dacorehepi Dio Pohua dacorajajari. ²⁰ Diopa pocca dacorehedsa Jesocristo dsoqqueraha inahatonijari. Memehuaij iaccamacossanidsa deni inanadsapa Pohua inori nahatonihuaji inahittaritari. ²¹ Nahidsapa memehuaijica, namihuajica huapima dossede tojajari. Pocca dacorehe deni tojajaro. Pocca

cacahuehe jiquejerajaro. Jidapana ajijaro dsamaccadsa deni tojajari. Nidsa dsotodecca dsama dsati ccajonajar-odsa naco nama dsanapohuitohui. Pocca deni tojehe jiquejeranitohui. ²² Diopa memehuajicca, namihuajicca huapima ajamani inanabaqquijari. Pohua Bedi Jesocristo deni inanadsapa huapima dossededeni tojajari. Ia naqui pocca iquejenajaro ia dossede tojajari, pina itatissa najari. ²³ Ia Cristodsa ijariqquijaropi pina pohua assiressa inajaro. Iadsa pajirahissa taridsajari. Meme, nami huapimadsa naco pohuana pajirahissa taridsajari.

2

Diopa iadsa huati cahanari canadsa ia tonassijabaqquijari

¹ Tahidepi ticcadeni tabaccorehe, ticcadeni imasiri-jine Diodsapi pina tecotajarossa najarode. ² Ticcadeni madie pina Diodsa toquejena-jarajaridenissa tiquinajarode. Ajijaro namicca imatohui disseraqquri tiquinadsapi Diocca huadi Satana attidsana iboraqquri tiquinajarode. Najaripa aja qqui inabaqqui-jarajarideni dossede tojaripaja. Puhuapa Diodsa iboqquri najaridenidsa naco dosse dosse najari. ³ Ia huapimapi tahide nema inapojaro. Diodsa iboqquri inajarode, ibodidsa tabaccorehe tohuini inaniccara ihinana najarode. Ime tohuini inanicca tabaccora taniccadsa disseraqquri inajarode. Imasirima issonarorejine Dio ia tonajidso-baqquidsapa pina madija huapima inajidsobaqquijarissa inanitohuiraha.

⁴ Diopa tohuati huanehe sse tajari. Itohui huati cahanari canajari. ⁵ Imasiri sseqquiri inajarojinepi pina ecotajarossa inaccade. Naraha Jesocristocca madija iquejenadsapi Diopa iadsa camittehe dsati da inajaro. Pocca tohuati huanehepi bica tani, deni tojani. Najaroma tiadenidsa huati cahanari canadsa tiadeni tonassijabaqquijari. ⁶ Madija ia huapima pina ecotajarossa

inaraha Diopa Jesocristo inahatonidsa ia naqui pohua tedseje ia tonahatonibaquijari. Nadsapi memehuaji Dio Pohuajine Cristo tedseje jassi inarinitohui. ⁷ Dio nama najaria nidsa dsotode pocca tohuati huanehe bicani iadsa inanani madija huapimadsa ahuato tanitohui. Aji icca ima Diodsa tobicajaropi Jesocristo pohuajine. Nadsapa Dio iadsa huati cahanari canahi madija qqui toquinahitohui. Najaro ima naqui mittamanahitohui. ⁸ Abi Diopa titohuideni huati cahanari canajaria tiadeni tonassiajabaquijari. —Jesocristo pajissa itohui dsoqquejari —tiquinadsapi tiadenidsa tossiejehe inanjaro. Tijinedeni jerani. Abi Dio tohuini nadsa manaconi jirehe tiadenidsa inanajaro. ⁹ Pajissa, Dio tiadeni tonassiajabaquijaripa bicaquiri tiquinajarojine jerani. Ima bicani tinanamanajarojine jerani. Najarojine madijapa: —Bica onajarojine Dio ohua tonassiajajari —najarahitohui. ¹⁰ Diopa tahide nahato tapojari: —Occa tonahatobaquijnaja ima bicanira inanamananitohui. Ohuatidsa madimanahissa tahitohui —nadsapa Pohua Bedi Jesocristo dosse inaronajari, pohuajine inahatomanidsati iquejenanijine.

Jodiodeni, jodio quejena-jarajaridenima Cristodsa ijariquijaro

¹¹ Tiadenipi jodiodenissa tiquinehe tissonamanagerajaropi jodio tiquejena-jerani. Huissinaja ticappiramanehe timadimanadsapi jodiodeni tiadenidsa: —Huissinaja jijiradedeni —quiquinanajari. Pohuadenipa najaro huissinaja cajimanadsapa pohuadeni canacanimanadsa: —Iapi huissinaja cajimanajarideni iquejenani —quiquinanajari. Nama quiquinanadsapa: —Iana Diocca madija iquejenani ahuato tani —quiquinanaraha assiredenidsara ahuato tajaro. Pohuadeni bodidenipa cacajiquimera-jerajaro. Naraha

tiadenipi tetideni ajimamana tejerana: Maittaccadsamapi Jesocristodsa nahatoqquiri tiquinejeraccade. ¹² Jesocristo jirehe timadimanaccade. Tiadenipi Isaraeri potemahi jodiodenidsa tiquejemamana-jeraccade. Diopa pohnadeni tedsejera jehe canirepojaride. Pohnadenidsara ima bicani onihi onihi huati tapojari. —Tiadenira onassijabaqqunitohui —napohui nade Abi Dio. Naraha tiadenidsapa nama najarajari. Ajijaro namidsa timadimanaporaha ponima Dio jirehe timadimanadsapi: —Idsoqquedsa icassiejeranitohui —tiquinejeraccade. ¹³ Tiadenipi Diodsa huajiji tinaccade. Naraha jidapana Jesocristo pohnajine Diodsa huajijira tinajaro. Pohna dsoqquedsa emene toccajarojinea tijariqquimanajaropaji.

¹⁴ Jesocristo pohnajine icajonerara canajaro. Ia jodiodeni, jodio tiquejena-jarajarodeni huapima ijariqquijaro. Aja jodiodeni, jodio quejena-jarajarideni tedseje ahuaji jipera, ahuaji jipera quinapojaricca imapi Jesocristojine jicajaro. Najaro imapi pina siba hua tamaroni dequerema huajaro idenihuaji jodiodeni, ideni onihihuaji jodio quejena-jarajarideni quinapojarissa najaro. Naraha Jesocristo najaro huattajohuecca ima inajicajaropi pina siba hua tamaroni dequerema huajaro inabararidsa tohuabajarossa najaro. ¹⁵ Diocca dosseniji Moisesi dsodo inapojaropi huapi tajaro. Najarodsa jodiodeni madijonamanajari. Naraha Jeso ahua porimacossanidsa dsoqquedsapa najaro nebojaro. Nama nadsapa aja jodio Jesodsa pajissa quinajarideni, jodio quejena-jarajari pajissa quinajarideni tedseje inatassaqquidsapa pohnadsa ojariqquimanajari. Nadsapa pohnadsa ojariqquimanajarideni huapima pohnajine cajonerara canajari.

¹⁶ Jeso ahua porimacossanidsa dsoqquedsapa aja jodiodeni, jodio quejena-jarajarideni tedseje ahuaji jipera,

ahuaji jipera quinajari ima pohuajine jicajaro. Jidapapa cajonerara canajari. Puhuadsa huapima tas-saqquimanahissa tadsapa pina pohua assire ojarijarissa quinajari. Puhuadsa pajissa quinajarideni huapima Dio tedseje cajonerajaripaja. ¹⁷ Jesocristo namihuaji ccaron-ajaripa ima bicani Dio tedseje icajoneranijinecca huati huati naridsajari. Jodio tiquejena-jerajaro Diodsa ssamo-qquiri tiquinapjarodenidsa najaro ima huati huati najari. Ia jodiodeni Diodsa nahatoqquiri inajarodenidsa naco huati huati najari. ¹⁸ Jesocristo pohuajine ia jodiodeni, jodio tiquejena-jerajarodeni huapima pohuadsa pajissa inadsapi Abi Diodsa iajiranijine ipajirani. Pohua Corime ia huapimadsa anijaripa ojarijari. Najaripa ia acco tocamabaquidsa Diodsa huati inadsapi Puhuadsa ia tonahuajira-baqqujari. ¹⁹ Jodio tiquejena-jerajaro tiadenipi pina dsama onihicca madijassa, pina dsama cappiramanajaridenissa tiquinaporaha jidapapi Jesocristodsa pajissa tiquinadsapi Diocca madija tedseje tiadeni naqui pocca odsacca madija tiquejenani. Tiadeni naqui Diodsa: —Abi —tiquinani. ²⁰ Djojine Jesocristodsa tijariqquimanajaro. Jesocristo pocca dodosse tabaqquina Jeso pohua tahimari mari mari ihicanabaqquimana najari. Dio Atti cacomeraqquiri najarideni naco pohua tahimari ehecomeramana nadsa timittamanadsapi pajissa tiquinajaro. Ima nema najaropi pina odsa canahatonijinecca imassa najaro. Odsa sibadsa canahatonijinepi tahide poni cahittanicca nami najorapojaro. Dsotodena siba hua tamarohujanidsapi odsa tocajararo. Jesocristocca dodosse tabaqquideni, Dio Atti cacomeraqquiri najarideni tedsejepa pina odsa cahittanicca namissa quinajari. Tiadenipi pina siba hua tamarohujaninissa tiquinajaro. Jesocristopa pina siba bicabotessa najari. ²¹ Puhuadsa jehe tiquinajarodenipi pohuadsa

tijariquimanajaro. Tiadeni acco tocamabaquijari, tibodideni denima tobicadsanaponijine. Tibodideni ssi-aja, huire tadsa ia Medsede madidsahijine. Pina Dio pocca odsa bica tocanajarossa tiquinanijine. ²² Jehe Jesocristodsa tijariquimanadsapi pina Dio madihijinecca odsassa tiquinajaro. Dio nahidsa madihijine Pohua Corime tiadenidsa inana-dsanapojari.

3

Diopa Pablo dosse inajari, jodio quejena-jarajarideni Jesocristo tahimari mittamanahijine

¹ Ohuapi Pablo, Jesocristocca dodosse ojajarojinepi toponi cocorodsa ohuedsajaro. Jodio tiquejena-jerajarodeni Diocca madija tiquejenanijine tiadeni mari mari ohocanabaqqi naraha occa madija jodiodenina ohuadsa huadimanadsa ohua coro idsimamanajarode. ² Occa ima timittamanadsapi jidapanana nahatoto tinani: Diocca tohuati huanehe tiadenidsa tojani tahimarini timittamananijine Dio ohua cadossejari. ³ Dio pocca ima bicani tahide madijadsa ahuatora taporaha Pohuajine ohuadsa tohuatojaro. Najaro ima badsira tehe tahidehuaji dsodo onapopa. ⁴ Najaro hua timanimanadsapi timittamananissa tanitohui. Nadsana: —Pajissa, Pablo Diocca ima bicani Jesocristo tahimari nahato tajari —tiquinanitohui. ⁵ Najaro imapi tahide icca ididenidsama Djojine aniporaha pohuadenidsa ahuato inana-jerajaro. Naraha jidapapi Dio Pohua Corimejine aja pocca dodosse tabaqqi bicaqqiri najaridenidsa, Pohua Atti cacomeraqqiri najari bicaqqiri najaridenidsa naco pocca ima bicani ahuato inajaropaji. ⁶ Aji Diocca ima bicani najoraporaha ahuatora tapojaropi ajima najaro: Jesocristo pohuajine icassiejeranijinecca ima jodio quejena-jarajaridenidsa

naqui bacco tajaro. Jodio quejena-jarajaridenipa jodi-
deni tedseje Jesocristodsa pajissa quinadsapa pohuadsa
ojariquimanajari. Pina pohua assire ojarijarissa quina-
jari. Nama quinadsapa jodio quejena-jarajarideni, aja
jodiideni tedseje Jesocristodsa toquejenadsapa Diocca
daniji bicani Pohua huati tapojaricca cajimanajari.

⁷ Ohuapi bica onejeraraha Dio ohuadsa bica tadsa
ohuadsa huati huana tajari. Pocca dacorehe ohuadsa
inapajiranissa tadsa ohua cadossejari. Jesocristo tahimari
icassiejeranijinecca madijadsa tojanijine maride ojarid-
sajaro. ⁸ Jesocristodsa toquejenajarideni mota huapi
taha bicaququiri naraha ohuapi bica onejerani. Occa ima
jadanipi tabaccora tade. Ohuapi Diocca madija huapi-
madsa ajimani ojani. Nema onaraha Diona ohuadsa
bica tajari. Ohua tocattejidsadsapa todsepe ijie bi-
cani ohuadsa da inajarode. Najaropi aji jodio quejena-
jarajaridenidsa Jesocristo tahimari icassiejeranijinecca
ima bicani maride occaridsanijine. ⁹ Dio ia Nahatode
Pohuajine maittaccadsama pocca ima bicani najorapo-
raha ahuatora tapoccade. Jidapana najaro ima tohua-
todsapi madija huapima mittamanahijine maride ohua
cadossejari. ¹⁰ Diopa nama najaria jidapana pocca madija
Jesocristodsa quequeriquimana najarideni Dio pocca na-
hatohue bicani jiquejeranicca ahuato inanamananijine.
Nadsapa memehuaji cacahuehe cajimanajarideni, pina
Diocca dodosse tabaqqi tamededeni, pina innocdsa qqui
inabaqqi-jarajaridenicca tamededeni huapima Diocca
nahatohue qqui toquinadsapa: —Pajissa, Diopa nahato-
jide rajari —quinahijine. ¹¹ Dio nama nahijinepa dsama
inahato-jeraccadsama: —Nidsa dsotode ajima onananito-
hui —napojari. Nadsapa ia Medsede Jesocristo ocasserani
ahuadsa ia Tonassajade tojadsapa Diocca ima najorapo-
jarocca pajissa tojajaro. ¹² Nadsapi Jesocristo ia Tonas-

siajadedsa pajissa inadsapi icappina-jeradsa Diodsa ia-jiressijaro. Pohuadsa huati inadsa ibodipi: —Pajissa etti mittahi —inajaro. ¹³ Nadsapi toponi cocoro onahanaraha Dio tinebomana-jarajo. Jodio tiquejena-jerajarodeni Jeso tahimari tiadenidsa tojanijine maride ojadssapi ohua coro idsimamanaraha pina tetidsemanaji. Aji ocasserani ohuajaropi tiadenidsa ima bicani tojanijine.

Pablopa Epesodenitohui Diodsa huati tajari

¹⁴ Jehe nadsama Dio iadsa ima bicani inanajaro obodi huatomadsapi opitodsa ohuittadsa Pohuadsa huati huati onajaro. ¹⁵ Memehuaaji animanajarideni, namihuaji animanajarideni huapimapa Dio inahatobaquijari, inajaro. ¹⁶ Diopa ojarahi bica taja, nahatojide raja nadsapa Pohuadsa huati onadsapi: —Abi Dio, Ticorimema ticca madija bodideni todacoramanahi nahijine ticca dacorehe tinanaridsaji —ohonanajaro. ¹⁷ Jesocristodsa pajissa tiquinadsa tibodidenidsa madihijine Diodsa huati huati onajaro. Diocca tohuati huanehema timadimananjine naqui Pohuadsa huatide dissera onajaro. Pina ahua jabo nami bodihuaji toqquedsimajarissa tiquinaji. Tjia-bodeni Diocca tohuati huanehedsa denima toqquedsimadsanapodsapi Diodsa tetideni huana tanijine, timecot-edenidsa naqui tetideni huana tanijine. ¹⁸ Tiadeni, ia inajaro huapima Diocca madija iquejenajaro. Diocca tohuati huanehe nahatoquiri inanijine Pohuadsa huati huati onajaro. Jesocristo itohui huati cahanari canahi tahimaripi deni tojani. Pocca tohuati huanehepi motarani. Dsama nemanehedsa ijiridsajaro. ¹⁹ Pocca tohuati huanehe deni tojajarojinepi nahato inanissa tanijine ipajira-jeraraha tiadenidsa ahuato tanijine Diodsa huati huati onajaro. Pocca tohuati huanehe tiadenidsa tojidseradsapi Dio tiadenidsa anihissa tahijine, onajaro.

²⁰ Nadsapi Dio deni toजारidsa etidsena. Pocca deni tojehe, pocca dacorehe nemanehepi ibodidsa anijaro. Najarodsa ima bicani inananiijine ipajirani. Tohuini inanicca Pohuadsa huati inadsapi iadsa inana tani. Naraha ibodi huatomajaropi ajimani. —Diopa ajama nahijine pajirahi —inanitide naraha Pohuapa denima inananiijine pajirahi. ²¹ Ia huapima Jesocristodsa ihiqueriqui najaropi Diodsa etidsedsa: —¡Abi Dio, bica tinani, deni tijani! —inanijine bica tani. Jidapanadsama nema idsanapona, onajaro. Pajissa nema nana.

4

Dio Corimejine ijariquijaro

¹ Jehe ohuapi ia Medsede Jesocristo tahimari mari mari ohonaridsa najarojine toponi cocoro onahanajaro. Tiadenipi Dio pocca madija tiquejenaniijine tiadeni huahua tabaqqijari. Nadsapi timadimananissa taji. Ticcadeni madie pina Dio tohuini nahiccassa tinamanana, onajaro. ² Tibodidenidsa: —Ohuapi ajimani ojan —tiquinani bica tani. Jonequiri tiquinadsa tettideni bica tadsa huati huati tiquinana. Timecotedeni tedseje tetideni cahanerara canadsa amadsati tedimana-jerana. Madija tiadenidsa nacassera tadsa naco pina mohuaradsa tinahanamanana, onajaro. ³ Dio Corime tiadeni acco tocamabaquidsa tijariquimananissa taji. Najarossa tidsanapomananiijine disseraqquri tiquinaji. Ticajonerara canehe timadimanadsapi nema tidsanapomananiijine tipajiramananitohui.

⁴ Ia huapima Jesocristodsa iquejenajaropi pohuadsa ijariquijaro. Pina pohua assire ojarijarissa inajaro. Dio Pohua Corime iadsa anijari naco ojarahi. Itedsejemacca ima bicani tohuini imadijaro naqui ojarini. Najaro iadsa tojanijine Dio ia tocattejidsabaqquijaripaja. ⁵ Ia

Medsedepa ojarahi. Najaripa Jeso. Pohuadsara jehe inajaro. Pohuadsa iquejenani ahuato tanijinepi ojarini. Najaropi passodsa ia topa dsanajaro. ⁶ Icca Abi Diopa ojarahi. Pohuapa huapimacca Abi memehujicca Pohuadsa iquejenajaro. Pahuana ia tohuacahua-baqqijari, ia Cacuahuade deni tojahicca. Pocca dosseniji Pohua tohuini nahicca ia cadossedsapa najarossa inana tani. Pohuapa huapimadsa madiridsajari.

Jesocristocca daniji idsepe ijiniijinecca onihi, onihi ibodidsa inanaridsajaro

⁷ Ia huapima ijariqqijaroraha idsepe ijiniijinepi onihi onihi icajiridsajaro. Dio Pohua tohuini nahiccassa inanaridsanijine Jesocristo ia huapimadsa da inabaquiridsajarode. ⁸ Najaro imassa najaro Dio Atti dsodo nanidsa dsodo napojaro:

—Memehujaji toccamacossanidsapa pohua dsepedsa toquejenajarideni iaccamacossani-baqqijari.

Nadsapa pocca madijadsa pocca daniji da inabaquiridsajaro —nani nade Dio Atti dsodo nanidsa.

⁹ Naraha —Toccamacossanihi —inadsapi ¿ima nejecossa najaro? Jehe, najaro tohuattijine ibodi huatomajaropi tahidepa namihuaji ccaronapojari, inajaro. ¹⁰ Aja ccaronapojaripa Jesocristo. Najari pohua toccamacossanijaria memehujaji madihi paja naccahi. Meme, nami huapimadsa Cristopa aniridsajari. ¹¹ Nadsama madijadsa da inaridsajaropi dsepedeni ijimanahijine inanaridsajaro. Ohuahadenipa Jesocristo pocca dodosse tabaqqi toquejenahijine inanabaqqijari. Ohuahadenipa Dio Atti huati iqquma-mananijine inanabaqqijari. Ohuahadenipa Dio Atti ecomeramana-ridsadsa Jesocristo pohuadsa jehe quinahijine dosse inabaquiridsajari. Ohuahadenipa

Diocca madija cacahuade toquejenahijine inanabaquijari. Ohuahadenipa Dio Atti mamaride toquejenahijine inanabaquijari. ¹² Nama nadsapa Jesodsa toquejenajari-deni inapajirabaquijari, Diodsa dsepedeni ijimanahijine, imecotedeni acco icamabaquijari-manahijine. Nadsapi Jesocristo pohua assiressa inajarodeni icca jeheniji denima todacorani nanijine. ¹³ Icca jeheniji todacorani dsanapodsapi nidsa dsotode ia huapima Jesocristodsa jehe inajarodeni ijariquuinissa tanitohui. Dio Bedidsa inocco tojidseranissa tadsapi pohuadsa nahatoquiri inanitohui. Nadsapi denima denima Dio jipa tahicca icahatteradsanapodsapi pina jadahideni nahatoquiri najarissa inanitohui. Diocca nahatohue icajinitohui. Icca madie pajiranissa tanitohui. Pina Jesocristocca madie bica tajarossa nanitohui. ¹⁴ Icca jeheniji dacoradsa Diocca nahatohue icajidsapi ibodi huatohue pina ejedeniccassa nejeranitohui. Ejedenipa tocahattera-jaraccadsa bodideni huatomanahissa tahijine pajiramana-jarahi. Pina jojodejine ppahua tajari ahuaaji tocca, ahuaaji tocca najarissa quinajari. Ejedenipa marinaja onihidsa, onihidsa toquejena tahi. Aja madija maidsehe huatide nahatoquiri najaridenipa ejedeni icamaidsabaquijari-manahijine pohuadenidsa najora tani. ¹⁵ Naraha iapi Diocca marinaja pajissaccadsana jehe inajaro. Najarodsa imadijaro. Imecotedenidsa eti huana tadsapi pohuadenidsa ima pajissara huati huati inajaro. Nema inadsapi icca madie tobicadsanaponitohui. Pina Jesocristocca madiessa nanitohui. Jesocristopa pocca iquejenajaro ia Dossedede. Pina itati essire dosse dosse najarossa najaro. ¹⁶ Itati essire dosse dosse najaropi iccaridsanijine, idsepe ijiniijine, ijipanijine najaropaji. Essirepi ojariraha nanidsa tohuariridsanipi huapi tani. Pina idsepe, ibiji, emori, isso najaropaji. Huapima ojariquidsapi essire dacorajaro. Najaro imassa

najaropi ia huapima Jesocristodsa ijariquidsapi idacora-jaro. Idsepe ijie onihi onihi icajiraha imecotedeni tedseje acco acco icanadsapi pina essire napijarossa inajaro. Eti cahanerara canadsa naqui icca queriquinaja todacorani najaro.

Jesocristojine madie dsati icajijaro

¹⁷ Jehe, nadsapi ohua Medsede ohua cadossedsapa pohua onima tiadenidsa huati onajaro. Ohuattissa tinamanaji. Tahide timadimanapodsapi ticcadeni tabaccorehema timadimanaccade. Naraha jidapana Diocca tiquejenadsapi pina Diodsa toquejena-jarajaridenicca madiessa tinanamana-jeraji. Pohuadenipa pohuama madimanasanapojari. Bodideni huatomanahijine ssamoqquri najari. ¹⁸ Bodideni dsidsi tajarojine mittamana-jarahi. Dio Atti ssamoqquri nadsapa Diocca madie bicanidsa huatidsemana-jarajari. Bodidenidsa ibohue dacorajaro. ¹⁹ Najaro ibohue pohuadenidsa dacoradsapi tabaccorehe inanamananijine disseraqquri najari. Huananehe huapima ihinanaridsamana najaro. Najaro tabaccorehe pohuadeni idimanaraha epejena quina-jarajari. Denima tohuini dsanapomanajari.

²⁰ Naraha tiadenipi nema nanicca tabaccorehe Jesocristocca marinajadsa ticahattera-jerani. ²¹ Pocca marinaja pajissacca timittamanadsapi timadimananissa tanijinena ticahatterajaro. ²² Nadsapi najaro Jesocristocca marinaja ticahatteradsapi ticcadeni madie jadani aji tiadeni tohuini tiquinapojaroccapo tinebomanaji. Tabaccorehe tohuini tiquinajaropi tiadeni tocamaidasabaqqujaro. Najaro tabaccorehepi tiadeni tonatabaccorajaro. ²³ Tibodideni tecajiquimeramanaji. Diodsa: —Occa ima jadani tohuini onejeranijine obodi dsati tinanaji —tiquinaji. ²⁴ Nadsapi Dio tibodideni dsati inanadsapi

ticcadeni madie naqui dsati tojanitohui. Diopa pina pocca imassa nehe timadimananijine tiadeni acco tocamabaquihitohui. Diocca imapi pajiranissa tajaro. Pohuapa imasiri cappirajari. Pocca pajissehedsa timadimanadsapi pina Pohuassa tiquinanitohui.

²⁵ Jidapana dsati tiquejenadsapi denima timaidsamana tejeraji. Timecotedenidsa ima pajissara huati huati tiquinaji. Ia huapima Jesocristocca iquejenaropi pina essire ojariquijarossa inajaro.

²⁶ Tedimanadsapi imasiri tinanamana-jeraji. Tedi-manaraha najaro huadadsa tetideni ssonani bica tani.

²⁷ Ticcadeni jamie tinebomana-jeradsapi paji, imasiri to-tonanade Satanajine tabaccorehe tinanamarana, onajaro.

²⁸ Madija boti tajaripa pocca botie nebona. Tarabaidsa bica taniccadsa dsepe ijidsapa cappira-jarahitohui. Cappiramanajaridenidsa da inahijine naco pajirahitohui.

²⁹ Tohuatti tabaccora taniccapi huati huati tiquine-
jeraji. Tohuatti bica taniccara huati huati tiquinaji. Nema tiquinadsapi timecotedeni bodideni acco ticamabaquidsa jehenijirideni todacorani nanijine. Tettideni bica taniccara mittamanadsapa bodideni huatid-semanahijine. ³⁰ Dio Corime oji tinanamana-jarahijine timadimananissa taji. Jesocristodsa jehe tiquinapodsama Dio Corimepa tiadenidsa anijonahi. Nadsapa nidsa dsotode Dio pocca madija inassijabaquihijinecca huada bacco tadsapi Pohua Corime anijaridenidsa: —Occa —nahitohui. Nadsapa najaridenina inassijabaquihijine.

³¹ Ocasserani temanadsapi oji tidsanapomana tejeraji. Ticcadeni huadie denima dacoranicca naqui tinebomanaji. Huadie ajimanicca naqui tecahuamanadsanapojeraji. Amossinidsa atti atti tiquinajaro, tatamasso tiquinajaro naqui tinebomanaji. Tabaccorehe onihi onihi

naqui tiadenidsa nohueranijine tinebomanaji, onajaro. ³² Tetideni cahanerara canadsa timecotedeni pina acco acco titicamabaquimana najo. Timecote tiadenidsa ima bica tejeranicca inanadsa naqui pohuadsa: —Epeje, ohuadi-gerani —tiquinaji. Tiadeni naqui ima bica tejeranicca tinanamanadsapi timecotedeni tiadenidsa: —Epeje, ohuadi-gerani —quinahijine bica tani. Pina Diopa Pohua Bedi Jesocristodsa tiquejenadsapi tiadenidsa: —Epeje, ticcadeni imasiri ohuati ajimani —najarissa tiquinaji, onajaro.

5

Diocca madija madimanahissa tahijinecca ima

¹ Jehe tiadenipi Diocca ejedeni tiquejenajaro. Pihuapa titohuideni huati cahanari canajari. Pocca ejedeni tiquejenadsapi Pihuajinessa tinanamanana, onajaro. ² Pocca tohuati huanehema huapima tohuideni tetideni cahanariri canaji. Jesocristo itohui huati huana tadsapa pohua ccaccoradsa dsoqqejari. Najaro pocca danijipi Diodsa bica tajaro. Pina bani bedi Diodsa da tahi botta tadsa majo ocassa tajarissa najaro.

³ Tiadeni Diodsa tiquejenajaropi huananehe huapima tinanamana tejeraji. Tettidenidsa naqui huananehecca huatide nohuerana. Tabaccorehe oppina tanicca onihi onihi Diocca madijadsa nohuerajaro. Madijacca tarabadsa acconi, todsepetaji acconi naqui tedimana tejeraji. Dsiniro, todsepetaji huemani tohuini tiquinejeraji. Diocca madija tiquejenadsa timadimananissa tanijinepi nema nanicca ima huapima huati tiquina tejeraji. ⁴ Ima ponima tabaccora tajaropi huati tiquina tejeraji. Tohuatti ponimacca, jidsehe tabaccora tanicca naqui huati tiquina tejeraji. Nema nanicca tohuatti tabaccora tajaropi Diocca

madijadsa nohuerajaro. Tettideni bica taniccadsara Diodsa tetidsemanana. —Jehe Abi Dio, bica tinani —titidsanapomana nanina bica tani. ⁵ Ajjijaro ima nahatoqqiri tiquinani: Huananehe inanamanajarodeni, tabaccorehe oppina tanicca inanamanajarodeni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Denima tohuini quinajarideni naco pina dsiniro tohuini, pina todsepetaji tohuini quinajari, najarideni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Nama quinajaridenipa pina siba nahatonidsa huatidsemanajarissa quinajari. Namicca tohuinira huatideni huanaqqiri najari. Diodsa huatideni huanaqqiri najarajari. ⁶ ¡Paji, madija tiadeni tocamaidساباққи-манарана! Tohuatti ponimacca huati huati toquinadsapa pina: — Tabaccorehe tinanamanani oppina tejerani. Dio tiadeni tonajidsobaqqi-jarahitohui —quina tahi. Naraha najarideni attidenidsa pajissa tiquinejeraji. Dio Attidsa iboqqiri najarideni huapimadsa Diocca najidsohue oppina tanicca ssonarinitohui. ⁷ Nama quinajaridenidsa tiquejemamana tejeraji. Pohuadenidsa tiajimanani nanina bica tani.

Ssijanidsa imadijaro

⁸ Jehe tabaccorehedsa timadimanapodsapi Dio jirehe timadimanajarode. Pina dsidsinidsa timadimanajarossa naraha Jesocristodsa tiquejenadsapi Dio tiadenidsa tojidserajari. Jidapapi ssijanidsa timadimanadsapi pina Dio ssiejenedsa madimanajaridenissa tiquinana. ⁹ Nema tiquinadsapi Dio Pohua ssiejene tibodidenidsa tossia-jabaqqihitohui. Najaripa Pohua Corimejine biquehe

tinanamanajaro, ticcadeni ima pajiranissa tajaro, pajissadsara timadimanajaro. ¹⁰ Dio Pohua jipa tahicca ticahatteraji. Puhuadsa bica tanicca nahatoto tinadsapi najarora tinanaridsamananijine. ¹¹ Aja dsidsinidsa madimanajaridenipa ima bicani tonanade ssamoqquri najari. Puhuadenipa ima ponimacca, tabaccora tanicca inanamanaraha tiadenipi pihuadenidsa tiquejemamana tejeraji. Puhuadenijine tabaccora tajaropi ahuato tinanamananina bica tani. Pina ssiajanihuaji joca tininebaqqimanajarissa tiquinana. ¹² Puhuadenipa ahuatorehedsa tabaccorehe inanamanajaro. Poccadeni tabaccorehecca ima ecomeranjinepi iadsa oppina tani. ¹³ Naraha tabaccorehe inanamanajarodsa Dio ssiejene ssonariridsadsapa poccadeni tabaccorehe nemaneha ahuato tanitohui. ¹⁴ Dio ssiejenejine huapima tohuatonissa tajaro. Najarojine maittaccadsama ajama quiquinanjari:

—¡Tedajaro nocco tijaji! ¡Tetiaraha ticamitemaniji!

Cristo pohua ssiejene tibodidsa ssiajaridsanitohui

—quiquinanjari, jiri jiri quinadsa.

¹⁵ Nadsama timadimananissa tanijine tibodideni huatonissa dsanapona. Pina ssamoqquri najaridenicca madiessa tiquinejerana. Nahatoqquri najaridenissa tiquinana. ¹⁶ Jidapapi tabaccorehe caji taridsanidsa timadimanaccajaro. Naraha tiadenipi ima bicanira tinanamananijine tinajoramanehe timadimanaji. ¹⁷ Pina ssamoqquri najaridenissa tiquinejeraji. Ia Medsede tohui nahiccara timittamananissa tanijine disseraqquri tiquinaji. ¹⁸ Tinoccodeni jano tanijine coma tanicca dsemana tejerana. Dse tiquinadsapi ticcadeni madie totabaccoranitohui. Ajima tiquinanina bica tani: Dio Pohua Corime tiadenidsa tojahijine Puhuadsa: —Ticorime ohuadsa tinanajo —tiquinana. Nema tiquinadsana ima bicanira tinanamananijine Dio Corime tiadeni dosse dosse

nahitohui. ¹⁹ Nama nadsapa timecotedeni tinahatidsebaquimanahijine jiri jiri tiquinaji. Aji Dabicca jijiricca bica tani, aji Dio Atti dsodo nanicca jijiri naqui bica tani. Dio Corime tibodideni tonahattabaquidsa naqui jiri jiri tiquinani bica tani. Tettideni, tibodideni nemanehema ia Medsede Jesocristodsa jiri jiri tiquinadsa naqui pohnadsa: —Bica tinani, deni tijani! —titidsanapomana naji. ²⁰ Huajjiradsa ia Medsede Jesocristo onima Abi Diodsa: —Jehe, epejeni. Tijine bica tani —titidsanapomana nana. Nadsapi imadinicca huapima icajidsa, icapiradsa naqui Diodsa: —Jehe, epejeni —inani bica tani. Ima bica tanicca iadsa anidsa, ima ocassera tanicca anidsa naqui nema nehe Diodsa: —Jehe, epejeni —inani bica tani.

Maquidejepa bedimeni tadsajani madimanahissa tahijinecca ima

²¹ Jesocristodsa tetideni huanaququiri nadsapi pina Jesocristo pohua ajamani tonanajarissa tiquinaji. Timecotedeni tedseje tettidenidsa ahuaji ibora, ahuaji ibora tiquinaji.

²² Amoneje maquideje ticajimanajarodeni naqui ticadeni maqqi attidsa iboraququiri tiquinana. Pina ia Medsede Jesocristo attidsa iboraququiri tiquinajarossa tiquinana. ²³ Amoneje cajijaripa pocca amoneje dossede tojjari. Pina Jesocristo pohnadsa toquejenajarideni dossede tojjarissa najari. Pohnadsa toquejenajaridenipa pina Jesocristo assiressa quinajari. Pohua naco pina pohnadeni tatissa najari. Pohua naco pohnadsa toquejenajarideni Tonassijade. ²⁴ Nadsapi maquideje cajimanajarodeni ponidenicca maqqi atti nemanehedsa iboraququiri nana. Pina Jesocristodsa quequeriquimana najarideni pohnadsa iboraququiri najarissa quinanjine, onajaro.

²⁵ Maqquideje amoneje ticajimanajarodeni naqui ticadeni amonejedsa tetideni huanaqquiri naji. Pina Jesocristo pohuadsa iquejenajaro itohui huati huana tarissa tiquinaji. Pihuapa itohui huati huana tadsa dsoqqejari. ²⁶ Nama najaripa pocca madija ibicarid-sanijine. Pohua attidsa ibodi inahirejaro. Tabaccorehe inebojaro ahuato tanijine naqui passodsas totopa icajijaro. ²⁷ Icca ima huire, ibodi ssiaja tadsa icca ima pajiranssa tanijine. Pina etero bicabote obero tarasssa, casinaqqi-jerarasssa inanijine. Nidsa pohua ccanipomadsa pohua pocca iquejenajaro bicaqquiri inadsa ia tohuaccamacossani-baqquihijine.

²⁸ Nadsama maqquideje amoneje cajjaripa pocca amonejedsara huati huana tana. Pina pohua pohua assiredsa huati huana tarissas nana. Pocca amonejedsa huati huana tararipa pohua pohuadsa naco huati huana tarari. ²⁹ Madijapa pohua assiredsa nacassera-jarajari. Pohua assiredsa huati huana tadsapa jijipa najari, pohua assire cacacahua najari. Jehe najaro imapi pina Jesocristopa pohuadsa toquejenajarideni ecahuabaqquijarissas najaro. ³⁰ Ia huapima pohuadsa iquejenajaropi pina pohua assire namanahassas inajaro.

³¹ Ima najarasssa najaropi maittaccadsama Dio huati tarari: —Maqquideje pohua bedimenidsas tojadsapa imehi imenidenidsas nebo, pohuadeniras madimanajari. Nadsapa pamarahas pina ojararissas quinajari —nahas nade Dio. ³² Najaro imapi assiredeni pamarahas pina assire ojararissas nahas toquejenajari. Najaro cajicajicca imapi imittaporahas ahuatoras taccades. Narahas jidapananas omit-tadsapi Jesocristodsas ijariqquijaroccas imapi pina cajicajicca imassas najaronas paji, onajaro. Najaro imapi ohuadsas bicas tararo. ³³ Nadsamas tiadenidsas huati omanipomajaro: Maqquideje amoneje cajimanajaridenipas poccas

deni amonejedsara huatideni huanacquiri nana. Pina pohua pohuadenidsa huatideni huanacquiri najarissa nana. Amoneje maqquideje cajimanajarodeni naqui ponidenicca maqquidsara iboraquiri nana, onajaro.

6

Imehideni bedideni tedseje madimanahissa tahijinecca ima

¹ Ejedenideni, tiadenipi ia Medsede tohuini nahiccara tinanamanani bica tanijinepi ticcadeni abi, ami attidenidsa iboraquiri tiquinaji. Najarona ima pajiranissa tajaro. ² Dio Atti dsodo nanidsa ajima najaro: —Ticcadeni abi, amidenidsa tetideni huanacquiri naji —nahi nade Dio Atti. Najaro dossenijipi Dio pocca dosseniji 10 nehe Moisesidsa da inajarodsa anijaro. Najaro dosseniji ojarie da inadsapi ima bicani tadsajani huati tapojari. Nadsapi najaro dosseniji ecahuadsapi ima bicani iadsa tojanitohui. ³ Najaroa aji Pohua Atti: —Tiadeni onamadibaqquinissa dsanaponijine. Ajijaro namidsa timadimanadsapi jadahi tiquejenanissa tanitohui —nahi nade Dio Atti.

⁴ Jehe, imehideni tiadeni naqui ticcadeni ejedeni tijinedeni huadimana-jarana. Madie bicani tocahatterahijine tedimana-jeradsa tinahattabaqquimanajo. Ticcadeni ejedeni Dio Pohua tohuini nahicca tocahatterahijinera mari mari titicanabaqquimana nana.

Madijacca dodosse tabaqquidenipa pohuadeni dossede tedseje madimanahissa tahijinecca ima

⁵ Nadsapi madijacca dodosse tiquejenajaro, tiadeni naqui ajijaro namicca tiadeni dossede attidsa iboraquiri tiquinaji. Pohua noppine ticappinamanadsa pohuadsa bicaquiri tiquinaji. Maidseraquiri tiquinadsa tidsepedeni ijimananissa taji. Pina Jesocristodsa tidsepedeni ijimanajarossa tiquinana. ⁶ Tiadeni dossede qqui

tajaradsa naco tidsepedeni ijimananissa tana. Pina tiadeni qqui tadsassa tiquinaji. Pina Jesocristocca do-dossessa tiquinana, Dio jipa tahicca titinanamana nani-jine. Tiadeni dossede attidsa naqui iboraqqiri tiquinana. Tibodideni bicaqqiri nadsa: —Jehe, ohua dossede attidsa ibora onana —tiquinana. ⁷ Nadsapi huatidsehema tibodideni bicaqqiri nadsa tidsepedeni ijimanana. Nema tiquinadsapi tiadeni dossede madijaraha pohuadsa tidsepedeni ijimanadsapi pina ia Medsededsa tidsepedeni ijimanajarossa tiquinajaro. ⁸ Ajijaro ima nahatoqqiri tiquinajaro: Nidsa ia Medsede Jesocristo ccanidsapa ima bicani tinanamanajaro manaconi tiadeni huapimadsa da inabaqqunitohui. Nama nahitohui dodosse tiquejenajarodenidsa, dodosse tiquejena-jerajarodenidsa naqui.

⁹ Nadsama dodossededeni. Tiadeni naqui ticcadeni dodosse tabaqqidsa bicaqqiri tiquinaji. Pina Jesocristodsa bicaqqiri tiquinajarossa tiquinaji. Ticamaid-sabaqquimana tajarajo. Jara tinabaqquimana tajarajo. Tibodideni huatoma-manaji: ticcadeni dodosse tabaqqi pohuadeni Medsedepa tiadeni Medsede Jesocristo ojarihi. Pohuapa tiadeni Cacahuade memehuaji madijari. Pohua attipa: —Ajajaridenipa dodossededeni toquejenajari, ajararidenipa dodosse toquejenajari —najarajari. Qqui inabaqqidsapa huapima najarissa canirejari.

Diocca dacorehe icajidsapi imasiri iadsa deni toja-jeranjine

¹⁰ Ohuemecotedeni, jidapapi occa marinaja jicanicca tiadenidsa dsodo onajaro. Ia Medsedepa dacorajari. Pocca dacorehepi deni tojanicca. Najaro pocca dacorehema dacoco tijiraji. ¹¹ Pina soldadossa tiquinaji. Soldadopa biquerahi noppine pohua cacahuahijine jadsirecca huedsajari. Tiadeni tecahuamananijinepi Diocca dacorehe ticajimanaji. Nema tiquinadsapi

Satanacca maidseheda tiedimamana-jeranitohui. Dacoraquiri tiquinadsa tidomodeni huanitohui. ¹² Imasiri deni toja-jeranijinepi jadsire inanajarossa najaro. Naraha icahadirenijinepi madija assire cajimana, tone cajimana najarideni tedseje jerani. Pohuadeni assire cappiramanajari qqui inabaqqui-jarajarideni tedsejena icahadirejaro. Najaridenipa tabaccorehe jinede Satanacca dodosse tabaqqui memehuaji jahiridsajari. Memehuaji madimanaraha ajijaro namidsa dacorehe cajimanajari. Pohuadenipa dsidsinidsa madimanajarideni ihicadosse-baqquimana najari, tabaccorehe inanamananijine. ¹³ Nadsama Satanacca dodosse tabaqquidsa jadsire tinanamananijinepi Diocca dacorehe nemaneha ticajimanana. Nadsana tabaccorehe ahuatodsa tiedimamana-jeranitohui. Imasiri tadsajani ticahadiredsapi dacoco tijiradsa tidomodeni huanitohui.

¹⁴ Nadsama tiadenipi dacoraquiri tiquinaji. Pina soldadossa tiquinaji. Soldadopa etero jadsirejinecca huedsajari. Naraha tiadenipi Diocca pajissehe, pocca biquehe tedsamanaji. Najaro ima pamehe ticajimanadsapi imasiri tadsajani ticahadiredsa tidomo huanissa tantitohui. ¹⁵ Jesojine Dio tedseje icajonerajarocca ima bicani maride disseraquiri tiquinaji. Najaro ima tecomerarid-samananijine tinajoramanehe timadimanaji. ¹⁶ Imasiri tadsajani ticahadirenijinepi ticcadeni jeheniji dacorajaro pina soldadocca camatassa najaro. Soldadopa bobadsa biquerahi noppine ssapa, ccara tajari pohua tedsejema da inajari. Tiadeni naqui jehe tiquinanissa tadsapi tabaccorehe jinedecca boba jororone cajihicadsa tibiqueramana-jeranitohui. Pocca maidsehe iadsa ssonarजारोपी पिना इा ससिते नजरिस्सा नजारी. ¹⁷ Jeso tahimari icassiejeranijinecca ia tohuacahua-baqquijaropi pina soldado pohua tati cacahuahijine ccara tajari ettarijarissa

najaro. Tabaccorehe tadsajani ticahadirenijine naqui Dio Pohua Corime Bicabote tibodidenidsa Pohua Atti inanajaro. Najaropi pina jadsirecca massito jadsira tocana-jarossa najaro.

¹⁸ Huajijiradsa Diodsa huati huati titiquina naji. Pohuadsa huatide tinebomana tejeraji. Dio Corime tibodideni acco tocamabaquihitohui. Tetideni huatodsa tinocodeni panehe timadimanaji. Pina soldado pocca huadi noppinedeni nocco panajarissa tiquinana. Tiadenidsa ima bica tadsa, ocassera tadsa naqui Diodsa huatide diseraqquri tiquinaji. Diodsa toquejenajarideni huapimatohui Diodsa huati huati titiquina naji.

¹⁹ Otohui naqui Diodsa huati huati titiquina naji. Nani ocappina-jeradsa Jesocristo tahimari icassiejeranijinecca maride ojadsa tohuatti pajiranissa taniccadsa madija mari ocanabaqqui-ridsahijine. Najaro ima bicanipi tahide Diojine ahuatora taporaha jidapana Pohuajine tohuatojaro. ²⁰ Najaro pohua tahimari mari onaridsanijine ohua Medsedepa ohua cadossejaride. Najarojine jidapapi todsepe ojajaro. Dio Pohuadsa huati huati tiquinaji, cappinehe ohuadsa nohueradsapi pocca dossehe onapajiranissa tanijine.

Pablocca ima jicanicca

²¹ Tiquicopa imecote bicabote. Pohuapa aji omadinicca, nomi onanicca, odsepe ijiecca huapima tiadenidsa huati tahitohui. Pohuapa ia Medsede Jesocristodsa ibora tadsa pohua tahimari maride dissera tajari. ²² Pohuapa itahimari tiadenidsa huati tahijine tiadenihuaji dosse onajari. Pohua naco tiadeni tonahatidsebaququidsa tibodideni acco tocamabaquihitohui.

²³ Icca Abi Dio, ia Medsede Jesocristo tedseje aji tijariquimanajaro tiadenidsa jonehe inanamanana.

Huapimadsa huatideni cahanariri cadsanapona, onajaro. Pohuadenidsa jehe tidsanapomananijine naqui tibodideni inadacora-baqquimanana, onajaro. ²⁴ Ia Medsede Jesocristodsa tetideni cahanariri canani dadoradsa tiadenidsa pocca biquehe tojadsanapona, onajaro.

Epejeni occa ima.

Ohua onipi Pablo.

El Nuevo Testamento en el idioma Culina (mádija) del
Perú

Kulina: El Nuevo Testamento en el idioma Culina (mádija) del Perú
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 30 Nov
2021

4c7c82dd-1f0f-5341-b6e6-26970c27fee2